

清彩抑讚？會出代誌喔！

好膽：細膩啊，代誌大條、代誌大條矣啦！

細膩：好膽的，你按呢親像痾狗舂墓墳，砢砢從是咧從啥貨？

好膽：阮老師講我惹代誌，欲通知阮母仔來學校。這聲轉去，阮母仔一定請我食「竹筍炒肉絲」，予我一頓仔粗飽。

細膩：你莫緊張，緊事寬辦。是啥物大代誌，愛予恁母仔生理放咧，撥工走來學校？

好膽：啊都有同學講我『公然侮辱』啦。

細膩：你是去和啥人冤家量債 hioh？

好膽：哪有？我都佇面冊共人抑讚爾。

細膩：面冊？

好膽：就是「非死不可、facebook」啊，唉，這聲真正「非死不可」矣。

細膩：是講共人抑讚是好代誌啊，那會予人投老師？

好膽：無啦，煞毋知阿雄和阿吉仔佇面冊頂頭咧袂拄好、有 kiù-sù。
阿雄貼文共阿吉仔譬相供體，我共抑讚，阿吉仔告阿雄連我就投參落。

細膩：按呢毋著火燒厝點過間，你去搵著風颱尾。

好膽：毋啥？阿吉仔就大箍呆、大箍呆，阿雄就佇面冊笑阿吉仔，若

廟裡做醮咬柑仔的豬公咧，我嘛感覺足好笑的，就共抑讚啊。

細膩：阿雄佇面冊笑阿吉仔，你共抑讚？

好膽：hēnn 啊，有夠好笑的，阿雄閣貼一張肥卒卒的豬公尪仔圖。嘻、
嘻。

細膩：好膽的，你有影是青暝的毋驚銃呢！

好膽：按怎講？

細膩：彼號做網路的霸凌，嘛算是『公然侮辱』。

好膽：干焦佇面冊抑讚爾，也毋是當面笑阿吉仔啊。

細膩：講予你捌、喙鬚就好拍結。你共抑讚，就代表你嘛是按呢想，
和當面笑阿吉仔是全款。

好膽：嘛猶有真濟 人佇面冊共阿吉倒鬪、正削啊。

細膩：遐的人全款有代誌。

好膽：按呢摠規摠的，毋就一綰若肉粽咧？

細膩：所以，毋通清彩擲香綴拜，看著烏影就開銃。

好膽：好啦，我知影毋著矣。

細膩： 你早若會曉按呢想就著矣。話講遮嘛喙焦矣，來，食一粒鹹酸
甜止喙焦咧。（提出一粒鹹酸甜予好膽的）

好膽：（窒落喙哺哺的）唉哟，有夠酸的。

細膩：欸，你閣哺看覓的，酸氣了後是毋是舌尾會鹹甜仔、鹹甜？

好膽：m̄，有影咧，去感覺舌尾的鹹甜，就袂有彼个酸氣矣！

細膩：其實，咱人地看代誌嘛是按呢。雖罔，有一寡代誌挂寔看，你會看袂落，小可酸氣仔酸氣……

好膽：著啊，所以網路頂頭就有彼號『酸民』，專門咧貼『酸文』，『酸溜溜』，酸 giùgiù，按呢貼來貼去，罵來罵去。

細膩：是啊，有當時仔真正是「啞口的相罵—毋知影啥人著」。毋過，咱愛趲對正面的角度去看代誌，你就有無全款的看法矣。

好膽：敢若鹹酸甜咧，舌尾會反甘甜。

細膩：親像阿吉仔有較大箍一屑仔，咱嘛愛用另外一个角度去欣賞。

好膽：m̄，我這馬看阿吉仔膨皮仔膨皮，生做嘛真將才，而且「頭大面四方，肚大居財王」，「大箍無呆是狀元才」…

細膩：好矣，好矣，你閣不只仔勢扶挺呢。重要的是，咱毋通「家己無跤肚仁，就怨妒人大尻川賴」。

好膽：無毋著，「好話加減講，歹話莫出喙」，共人 芳水，家己嘛會沐著芳水味，逐家相傍福氣啦。

細膩，好膽：欸…

「網路虛擬的世界，可比現實社會代；

互相好心來對待，發揮正面力量才應該啊才應該。」

細膩，好膽：落台行禮。